

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 13
Hulyo 7, 2010
www.philippinerevolution.net

Editorial

Noynoy Aquino: Ang bagong mukha ng kontra-rebolusyon

Si Benigno “Noynoy” Aquino III ang bagong mukha ng kontra-rebolusyon. Pormal na siyang iniluklok noong Hunyo 30 bilang bagong pinuno ng papet na reaksyunaryong gubyerno. Siya na ngayon ang pangunahing tagapagtaguyod ng paghahari ng imperyalismong US, at lokal na malalaking burgesyang komprador, burukratang kapitalista at panginoong maylupa.

Sa kanya ngayon nakaa-tang ang pangunahing responsibilidad na ipagpatuloy ang pamamahala sa bulok at bangkaroteng malakolonyal at malapyudal na sistema, pata-tagin at patakbuhan ang estado nito, at supilin ang anumang hamon sa papet na reaksyunaryong kapangyarihan.

Katulad ng inaasahan sa kanya ng imperyalismong US at mga lokal na naghaharing uri, itinuon ni Aquino ang kanyang unang mga araw sa pagkokonsolida ng papet na hukbo. Batid ni Aquino na ang Armed Forces of the Philippines (AFP) ang pangunahing sandalan ng reaksyunaryong paghahari sa Pilipinas. Ito ang mag-sisilbing pangunahing instru-

mento niya sa paghawak sa kapangyarihan at pagpapatupad ng mga tungkulin. Kaya naman todo ang pagsuporta niya rito: pangakong dagdag na tauhan, bagong kagamitan, pabahay para sa mga sundalo at iba pa.

Hindi niya kinastigo ang AFP sa malalaking krimen nito sa mamamayan. Sa gayong paraan, ipinahiwatig ni Aquino ang pagsuporta niya sa buhong na pasistang kampanya ng panunupil ng AFP na nagresulta sa laksang kaso ng paglabag sa karapatang-tao. Tahasan niyang binalewala ang hinaing ng ilampung libong biktima ng karahasan militar at ng mga tagapagtaguyod ng karapatang-tao. Ni

hindi siya nangakong magkakaroon ng makatarungang pagtutuos sa laksa-laksang pasistang krimen sa ilalim ng mga nagdaang rehimen at pagparusa sa mga utak nitong upisyal ng papet na militar at pwersang panseguridad.

Habang todo-todo ang paglalangis niya sa AFP, wala ni katiting na pansing ibinigay si Aquino sa mga saligang suliranin ng bayan at sa kanilang sigaw para sa kata-rungang panlipunan. Ang mga unang araw niya sa poder ay itinuon sa pagpapasiklab



Mga tampok sa isyung ito...

Seryoso ba si Aquino sa usapang pangkapa-papaan? PAHINA 5

Bayan Muna coordinator, pinaslang PAHINA 7

Krisis sa European Union, lumalala PAHINA 9

nang ipagbawal niya ang paggamit ng “wangwang” (sirena) sa kalsada upang palabasing siya’y kaisa sa mamamayan laban sa pang-aabuso ng mga makapangyarihan.

Hindi raw siya manhid sa mga daing ng mamamayan, pero nagmamang-maangan siya sa harap ng sigaw para sa lupa ng masang magsasaka. Nagsasasatsat siya tungkol sa mga serbisyong pang-agrikultura pero wala siyang anumang salita tungkol sa pagbabaklas ng monopolyong pag-aari sa lupa at sa idinudulot nitong kahirapan at kaapihan ng mga magsasaka. Lalong wala siyang anumang binanggit tungkol sa Hacienda Luisita ng kanyang angkan.

Nagdudumilat ang napakalaking disempleyo at ang labis na kapakanan ng sahod ng mga manggagawa. Subalit ang tangi niyang malialok ay ang pakitang-taong planong “emergency employment” para raw sa milyun-milyong walang hanapbuhay. Tulad sa nakaraan, likha lamang ito ng ilusyon ng empleyo. Wala itong magiging tunay na kabuluhan dahil napakaliit at panandalian ang anumang malilikha nitong trabaho. Pinagtataktan lamang nito ang saligang problema

ng pagkaatrasado ng ekonomya, kawalan ng tunay na pambansang industriya at pagbagsak maging ng agrikultura.

Hindi ito malulutas ni Aquino sa pag-uulit lamang niya ng dati nang neoliberal na bukambibig ng mga nagdaang rehimen ng “pagbibigay ng patas na pagkakataon para sa mga negosyo at gawing kaakit-akit ang bansa sa mga danyuhang mamumuhunan.” Wala itong ibang kahulugan kundi ang pagbibigay ng ibayong kalayaan para bahain ang bansa ng mga sobrang produkto ng malalaking kapitalistang bansa, gipitin ang maliliit na lokal na negosyante at mamamayan, wasakin ang lokal na pwersa sa produksyon, dambungin ang likas na yaman at pagsamantalahan ang murang lakas-paggawa sa bansa.

Ang mga patakaran ding ito at talamak na korapsyon ang dahilan kung bakit lugmok ngayon ang



reaksyunaryong gubyerno sa labis na pagkabangkarote at pagkakautang. Sa kabila nito, walang plano si Aquino na itigil ang paglulustay ng pinakamalaking bahagi ng badyet ng gubyerno sa papalaking bayad-utang.

Di magtatagal ay hahantong din si Aquino sa pagpapataw ng karagdang mga buwis, pagtitipid sa mga esensyal na serbisyong panlipunan, pagsasapribado pa ng mga pag-aaring pampubliko at higit pang pangungutang.

Hindi kumakawala si Aquino sa dati nang mga patakarang idinidikta ng imperyalismong US. Hindi usapin para sa kanya ang walang kaabug-abog na pagyurak sa pambansang kasarinlan ng Pilipinas, pagdambong sa kabuhayan ng bansa at pagsasamantala at pang-aapi sa mamamayan. Wala siyang ipinahayag na balak na repasuhin ang mga di pantay na tratado, o hamunin at hadlangan ang tuluy-tuloy na panghihimasok ng US sa bansa.

Katunayan, ang mga disenyo ng imperyalismong US ang sinusunod niya ngayon sa kanyang linya ng kontra-rebolusyon. Ang deklarasyon niyang “gagapiin natin ang kaaway gamit ang katarungan, repormang panlipunan at pantay-pantay na pamamahala tungo sa mas magandang buhay” ay halos eksaktong kopya mula sa Counterinsurgency Guide ng US (USCG).

Nakatuon ito sa pagkabig sa tiwala ng mamamayan gamit ang mga programang pakitang-tao, pampasiklab at pampabango habang nakasalalay sa pwersa ng pagsismo upang supilin ang mga kritikal na lumalaban. Susubuan ang bayan ng mapanlinlang at walang



Taon XLI Blg. 13 Hulyo 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Aquino: Mukha ng kontrarebolusyon	1
Usapang pangkapayapaan	3
Ilitaw sina Calubid	4
Batang CAFGU sa SMR	4
Bagong lumang gabinete ni Aquino	5
Depist sa badyet	6
Arroyo, kinasuhan	7
Kurakot hanggang katapusan	7
Mga aksyong militar	8

Pananalanta ng pasistang estado

BM coordinator, pinaslang	9
Unyon sa ABS-CBN, winasak	10
Mga magsasaka, inaresto	10
Cardeño	12
Krisis sa EU, lumalala	13
Kilos-protesta sa Europe	14
5,000 nagwelga sa Bangladesh	15
Protesta laban sa G8	15

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

sustansyang propaganda habang tangan ang baril na nakatutok sa ulo nila. Ito ang ubod ng linya ng kontra-rebolusyon ni Aquino.

Walang pagpapahalaga ang USCG sa usapang pangkapayapaan bilang paraan para lutasin ang mga ugat ng digmaang sibil. Wala ring ipinakikitang malaking interes si Aquino na muling masimulan ang usapang pangkapayapaan sa pagitan ng Gubyerno ng Republika ng Pilipinas at ng National Democratic Front of the Philippines (NDFP).

Gayunman, bilang pagtugon sa naunang pagpapahayag ng NDFP ng pagiging bukas nitong ipagpatuloy ang pormal na usapang pangkapayapaan, idineklara ng bagong rehimen ang kahandaan din nitong daanin sa negosasyon ang paglutas sa armadong tunggalian. Subalit upang aktwal na umusad ang pag-uusap, dapat kilalanin at itaguyod ng bagong rehimen ni Aquino ang dati nang mga kasunduan at seryosong ipagpatuloy ang pag-uusap sa nalalabi pang mga adyenda.

Mulat ang mga rebolusyonaryong pwersa na ang bagong rehimen ni Aquino ay pagpapatuloy lamang ng nagdaang mga rehimen. Bago man ang mukha, wala namang nagbago sa esensya. Ang estadong pinamumunuan ni Noy-noy Aquino ay ang makauring diktadura ng mga mapagsamantala at mapang-api na siya ring pinamunuan nina Gloria Arroyo at mga nagdaang pinunong papet ng US.

Tulad sa mga panahon ng iba pang nakaraang papet at reaksiyunaryo, nakahanda ang rebolusyonaryong kilusan na harapin ang bagong rehimeng US-Aquino upang maisulong ang pambansa at demokratikong adhikain ng sambayanan sa lahat ng larangan ng pakikibaka—sa larangan ng armadong pakikibaka, hayag na pakikibaka at usapang pangkapayapaan. **AB**

Seryoso ba si Aquino sa usapang pangkapayapaan?

Kung pagbabatayan ang talumpati sa kanyang pagpapasinaya, mababa ang pagpapahalaga ni Benigno Aquino III sa usapang pangkapayapaan sa National Democratic Front of the Philippines (NDFP) bilang paraan para resolbahin ang mga ugat ng armadong tunggalian.

Ni hindi siya nagpahiwatig ng intensyong makipag-usap sa NDFP at sa halip ay idineklarang “gagapiin natin ang kaaway gamit ang katarungan, repormang panlipunan at pantay-pantay na pamamahala tungo sa mas mabuting buhay.”

Ilang araw pagkatapos ng inagurasyon, nagpahayag si Teresita Deles, ang Presidential Peace Adviser ng rehimeng Aquino, na nagpadala na siya ng mensahe sa NDFP para sabihing muling bubuksan ang naunsyaming usapang pangkapayapaan at bubuin na ang *peace panel* ng gubyerno katapat ng sa NDFP. Tugon ito sa nauna nang pahayag ng NDFP ng kahandaang harapin ang rehimeng Aquino sa negosasyon upang talakayin ang mga ugat ng armadong tunggalian.

Binati ng Partido Komunista ng Pilipinas (PKP) ang pahayag na ito ng upisyal ni Aquino. Gayunpaman, pinaalalahanan nito si Aquino na para muling masimulan at umabante ang pormal na usapang pangkapayapaan, dapat niyang pangatawanan at itaguyod ang lahat ng nakaraang kasunduan sa pagitan ng NDFP at ng reaksiyunaryong gubyerno.

Kabilang dito ang The Hague Joint Declaration of 1992 na siyang naglalalatag sa mga prinsipyo, balangkas, adyenda at mga pamamaraan para sa mga pag-uusap, ang Joint Agreement on Safety and Immunity Guarantees (JASIG) at ang Comprehensive Agreement

on Respect for Human Rights and International Humanitarian Law (CARHRIHL).

Inaasahan din ng PKP na iwa-wasto ni Aquino ang ginawa noon ni Arroyo na pakikipagkutsabahan sa imperyalismong US at iba pang imperyalistang bansa para isama sa kanilang listahan ng mga “dayuhang terorista” ang PKP, BHB at ang punong pampulitikang konsultant ng NDFP na si Kasamang Jose Ma. Sison.

Nananawagan din ang PKP na panagutan at palitawin ng gubyernong Aquino ang mga konsultant ng NDFP tulad nina Leo Velasco, Prudencio Calubid at Rogelio Calubad at mga istap ng NDFP na dinukot ng mga pasistang ahente noong 2006 at hanggang ngayoy hindi pa inililitaw. Dapat ding kagyat nang mapalaya ang maraming iba pang iligal na ikinulong na konsultant at istap ng NDFP at iba pang aktibista at masusugid na kritiko ng papet na reaksiyunaryong estado at sistema.

Iginigiit din ng PKP na mabigyan ng kaukulang resolusyon ang mga kaso ng mabibigat na paglabag sa karapatang-tao. Kaugnay nito, dapat ipatupad ang probisyon sa CARHRIHL ng pagbibigay ng bayad-pinsala sa mga biktima ng pasistang diktadurang Marcos na nanalo sa kaso na isinampa noon sa US.

Dapat ding bigyang-katarungan ang lahat ng biktima ng walang pakundangang paghahasik ng teroristang lagim sa ilalim ng nagdaang rehimeng Arroyo. **AB**

Paglilitaw kina Calubid, iginigiit

Nanawagan ang Partido Komunista ng Pilipinas (PKP) nitong Hunyo 26 sa Armed Forces of the Philippines na ilitaw si Prudencio Calubid na dinukot ng mga ahenteng militar apat na taon na ang nakaraan. Si Calubid ay kagawad ng Komite Sentral ng PKP, upisyal ng Bagong Hukbong Bayan (BHB) at isa sa mga *peace consultant* ng National Democratic Front of the Philippines (NDFP).

Dinukot siya kasama ang kanyang asawa na si Celina Palma, pamangkin na si Gloria Soco, at dalawang istap na sina Ariel Belo at Antonio Lacno sa Quirino Highway, bandang Sipocot, Camarines Sur noong Hunyo 26, 2006. Makaraan ang dalawang araw ng matinding pagpapahirap sa kanila, nakatakas si Lacno nang dalhin sila sa isang liblib at mabundok na lugar para patayin. Walang nakakaalam kung ano ang kinahinatnan nina Calubid at iba pa niyang kasamahan hanggang sa ngayon.

Ang pagdukot at pagpapahirap kina Calubid, Palma, Soco, Belo at Lacno ay isa sa mga pinakakarumal-dumal na krimeng ginawa ng mga pasistang ahente ng rehimeng US-Arroyo, ayon sa PKP. Isa itong hayagang pagyurak sa karapatang-*tao* at paglabag sa Joint Agreement on Safety and Immunity Guarantees (JASIG) at ng Comprehensive Agreement on Respect for Human Rights and International Humanitarian Law (CARHRIHL) na nilagdaan ng magkabilang panig, dagdag ng PKP.

Iniaatang ngayon ng mga rebolusyonaryong pwersa sa Pilipinas sa bagong rehimen ni Benigno Aquino III ang responsibilidad para panagutin ang mga salarin at bigyang-katarungan sina Calubid at iba pang biktima ng paglabag sa karapatang-*tao*.

Samantala, nabuhayan ng loob ang mga kamag-anak ng mga *desaparecido* (mga dinukot at nawawala pa rin hanggang ngayon) nang su-

mama nitong Hulyo 2 ang Commission on Human Rights (CHR) sa paghikayat kay Benigno Aquino III na lumagda sa International Convention for the Protection of All Persons From Enforced Disap-



pearance.

Dapat muna itong malagdaan ng hindi bababa sa 20 bansa para maging epektibo. Mayroon nang 18 bansang lumagda rito.

Sa mahigit siyam na taong paghahari ni Arroyo ay nagtala ng 1,206 kaso ng ekstrahudisyal na pamamaslang, 205 kaso ng pagdukot sa mga aktibista kabilang ang

mga konsultant ng NDFP sa usapang pangkayapaan, daan-daang kaso ng pang-aaresto at iligal na detensyon at mahigit

1,000 kaso ng pagtortur na pangkagagawan ng mga armadong galamay ng gubyrerno. **AB**

AFP, nagrekrut ng mga batang kombatan

ISA sa mga inaresto ng Bagong Hukbong Bayan (BHB) nang magtayo ito ng tsekpoynt sa Sityo Mabatas, Barangay Upper Ulip, Monkayo, Compostela Valley noong Hunyo 19 ay isang 17-taong gulang na elemento ng Citizens Armed Force Geographical Unit (CAFGU) sa ilalim ng 10th Infantry Division ng Philippine Army.

Nahuli si "Jomar" (hindi tunay na pangalan) habang papunta sa kanilang detatsment sa Mount Diwalwal. Nakaangkas siya noon sa motorsiklo ni S/Sgt. Bienvenido Gentugao Arguelles Jr. ng 25th IB.

Napag-alaman ang tunay na edad ni "Jomar" nang isailalim siya sa imbestigasyon ng Conrado Heredia Command ng BHB sa Southern Mindanao Region. Ipinanganak siya noong Oktubre 1992. Bagamat wala pa siyang 16-taong gulang ay nirekluta siya noong Oktubre 2008 sa grupong paramilitar ng Philippine Army. Alam ng militar na si "Jomar" ay menor de edad. Sa katunayan, 18 silang magkakaedad na isinailalim sa 45-araw na pagsasanay sa hedkwarters ng 1001st Infantry Brigade sa Barangay Tuburan, Mawab, Compostela Valley.

Ayon kay "Jomar," binigyan siya ng pekeng *birth certificate* na nagsasaad na siya ay ipinanganak noong 1990 imbes na 1992. Ganundin ang ginawa sa mga kasabay niyang menor de edad. Noong Disyembre 2, 2008, upisyal siyang naging elemento ng CAFGU sa isang seremonya sa 72nd IB Company Post sa Compostela Valley.

Isang kombatan si "Jomar" nang siya ay maaresto ng BHB. Gayunpaman, hindi siya tinrato na isang "prisoner of war" (POW) dahil sa kanyang murang edad at bilang paggalang sa kanyang karapatan. Handa siyang pauwiin ng BHB sa kanyang mga magulang kung walang isasagawang mga hadlang para sa kanyang agarang paglaya. **AB**

Ang bagong lumang gabinete ni Noynoy Aquino

Bahaging Hyatt 10, bahaging malalaking kumprador at bahaging Kamag-anak at Kaklase Inc. Ganito mailalarawan ang kalakhan ng binuong gabinete ng rehimeng US-Aquino 2. Pinaghalong lumang mga burukrata at pulitiko na nagsilbi sa kinamumuhiang rehimeng Arroyo; malalapit na kamag-anak at kaibigan; at pinakamalalaking kontribyutor ng kanyang kampanya. May iilan lamang na posible pang asahan ng mamamayan.

Ang Hyatt 10 ay bansag sa sampung upisyal ng gabinete ni Gloria Arroyo mula 2001-2005 na dating kasabwat ni Arroyo sa iba't ibang katiwalian, pero nagbitiw

sa pwesto matapos mabunyag ang pandaraya ni Arroyo sa eleksiyong 2004. Ang mga kabilang sa Hyatt 10 na muling hinirang ni Aquino sa pwesto ay sina Cesar Purisima (ibinalik sa Department of Finance); Florencio Abad (dating Department of Education, ngayon ay nasa Department of Budget and Management), Teresita Deles (ibinalik bilang Adviser on the Peace Process) at Corazon "Dinky" Soliman (ibinalik sa Department of Social Welfare and Development).

Pinananatili namang kalihim ng Department of Foreign Affairs si Alberto Romulo. Nagsilbi rin sa ilalim ng rehimeng Arroyo sina Rosalinda Baldoz (Department of Labor and Employment), Enrique Ona (Department of Health) at Ramon Paje (Department of Environment and Natural Resources.) Umangat naman sa pwesto sa Bureau of Internal Revenue si Kim Jacinto-Henares, dating tagapangasiwa ng pangungulekta ng buwis sa malalaking kumpanya.

Mula sa malalaking negosyo, binigyan ni Aquino ng matataas na pwesto sina Alberto Lim (Department of Tourism) na presidente



ng Makati Business Club; Gregory Domingo (Department of Trade and Industry) mula sa

SM Investments Inc. at

Belle Corp; Rogelio Singson (Department of Public Works and Highways) mula sa Maynilad Water Services; at Jose Almendras (Department of Energy) na nagsilbi bilang presidente ng Manila Water. Kinakatawan ng mga ito ang malalaking burgesya kumprador sa pangkalahatan at ang mga pamilyang Sy, Ayala, Razon, Pangilinan at Lopez sa partikular, na pawang naging malalaking kontibyutor sa kampanya ni Aquino.

May iba pang nagsilbi sa ilalim ng rehimen ni Cory Aquino at may personal na katapatan sa pamilyang Aquino. Kabilang dito sina Voltaire Gazmin (pinuno ng Presidential Security Group [PSG] ng Malacañang sa panahon ng unang rehimeng US-Aquino at ngayoy pinuno ng Department of Defense), Cayetano Paderanga Jr (ibinalik sa dati niyang hinawakang Department of Socio-Economic Planning at bilang pinuno ng National Economic Development Authority) at Jose "Ping" de Jesus (Department of Transportation and Communication.) Si de Jesus ay presidente ng Meralco bago siya muling hinirang sa gabinete. Maging ang bagong

hepe ng AFP na si Lt. Gen. Ricardo David ay dati nang upisyal ng PSG ng unang rehimeng Aquino.

Itinalaga ni Aquino ang kanyang matalik na kaibigan at matalagal nang personal na abugado na si Paquito "Jojo" Ochoa Jr. bilang Executive Secretary. Hinirang naman ang kaibigang si Bro. Armin Luistro, presidente ng La Salle, bilang kalihim ng Department of Education. Ang iba ay tauhan o kamag-anak ng kanyang mga tagasuporta tulad ni Julia Abad, anak ni Florencio Abad at itinalaga para mamuno sa Presidential Management Staff at Col. Ramon Dizon (dating elemento ng PSG sa ilalim ni Cory Aquino at ngayoy hepe na nito).

Wala mang upisyal na katungkulan sa gabinete, malaki ang papel ng apat na kapatid na babae ni Aquino sa proseso ng pagdedesiyon ng kanyang rehimen. Nakaupo sa iba't ibang komite ang mga ito, kabilang ang mapagpasyang komiteng nagrekomenda ng mga pangalan sa binuong gabinete at iba pang pusisyon. Mismong si Aquino ang nagsasabing lahat ng kanyang mga desisyon ay isinasangguni niya muna sa kanyang mga kapatid.

Pagpapatuloy ng mga dating kalakaran

Isang matingkad na katangian ng bagong lumang gabinete ang pagkakatalaga ng masusugid na tagapagtanggol ng liberalisasyon at deregulasyon ng lokal na ekonomya. Wala itong pinag-iba sa mga upisyal ng rehimeng Arroyo na nagbangkrap sa ekonomya at sumira sa kabuhayan ng mamamayan. Pangu nahin na rito si Paderanga, na nagtulak ng ganap na liberalisasyon mula pa sa panahon ng unang rehimeng Aquino. Nariyan din si Purisima (Finance) na nagtulak ng pina-saklaw na Value Added Tax (VAT) noong 2005. Isa sa mga unang balakin ng rehimeng Aquino ay ang

pribatisasyon ng bahagi ng guberno sa Malampaya *project*, Sucat *thermal power plant*, Navotas *gas turbine plant* at Malaya *thermal power plant*.

Malawak at malakas ang pagtutol ng Uniffors (organisasyong kinabibilangan ng maraming upi-syal at istap ng Department of Foreign Affairs) sa pagpapanatili kay Romulo sa DFA. Mariing kinundena rin ng mga progresibong grupo ang pananatili sa kanya. Batbat ang rekord ni Romulo ng pangangayupapa sa interes ng imperyalismong US. Binigyang-daan ni Romulo ang pagpapalaya kay Daniel Smith, isang sundalong Amerikanong nahatulan sa panggagahasa kay Nicole noong 2005 sa Subic Bay. Si Romulo ay mahigpit ding tagapagtanggol ng Visiting Forces Agreement at ng permanenteng presensya ng tropa ng US sa bansa.

Mariin din ang pagtutol ng mga progresibong unyon ng mga manggagawa at mga organisasyon ng mga migrante sa pagkakatalaga kay Baldoz sa Department of Labor and Employment. Si Baldoz ay may masahol at inutil na rekord bilang tagapangulo ng Philippine Overseas Employment Administration (POEA).

Kinundena rin ang pagkakatalaga kay Ramon Paje sa DENR. Si Paje, na nagsilbing pinuno ng Minerals Development Council, ay isa sa mga pinakamasusugid na tagapagtaguyod ng dayuhan at malakihang pagmimina sa bansa.

Binatikos naman ang pagkakatalaga kay Ona sa DOH ng Health Alliance for Democracy (HEAD). Ayon sa HEAD, sangkot si Ona sa pangangalakal ng mga *kidney* sa mga dayuhan noong siya ang Executive Director ng National Kidney and Transplant Institute. **AB**

Nakaamba ang karagdagang buwis, pagtitipid at pangungutang

Pamana ng rehimeng Arroyo sa rehimeng Aquino ang pinakamalaking depisit sa badyet sa kasaysayan ng bansa. Para sa taong 2010, tinatayang aabot ito sa P340 bilyon o 4.2% ng Gross Domestic Product (GDP o kabuuang lokal na produksyon). Nagkakaroon ng depisit sa badyet kung ang isang guberno ay gumagastos ng mas malaki kaysa nakukolekta nitong buwis.

Para maagapan ang depisit, palit-ulit lamang ang ginagawa ng reaksiyunaryong guberno: ang patawan ng papalaking buwis ang mamamayan, bawasan ang pondo sa mga batayang serbisyong panlipunan at mangutang sa loob at labas ng bansa.

Noong 2005, si Finance Secretary Cesar Purisima mismo ang nagmungkahing mas palawakin pa ang saklaw ng Value Added Tax (EVAT) para punan ang depisit sa badyet. Isa rin ang bagong BIR Commissioner na si Kim Henares sa mga nagtulak nito. Naipasa at naipatupad bilang batas ang EVAT sa kabila ng mariing pagtutol ng mamamayan. Bilyun-bilyon ang nakamal ng rehimeng Arroyo, laluna sa panahong nagtaasan ang presyo ng mga bilihan at serbisyo.


Noong nakaraang buwan lamang, iminungkahi ni Margarito Teves, kalihim ng Department of Finance ni Arroyo, na muling itaas ang EVAT mula 12% tungong 15%. Ito rin ang bilin ng World Bank at iba pang imperyalistang institusyon. Hindi ito gagawin ng bagong guberno, pangako ni Aquino. Maaring hindi kaagad pero hindi ito maiiwasan, bawi ni Purisima.

Para mabawasan ang depisit, hahabulin diumano ng rehimeng Aquino ang malalaking kumpanyang

umiiwas magbayad ng buwis at mga sangkot sa ismagling. Tinatayang umaabot sa P150 bilyon ang nawawala sa guberno dahil sa di pagbayad ng buwis at ismagling. Nguni nitong nakaraang mga taon, mangilan-ngilan lamang ang nakasuhan na mga korporasyon at umaabot lamang sa P110 milyon ang nalikom ng BIR mula sa mga ito. May mungkahi pang bawasan ang buwis sa mga negosyo mula 30% tungong 20%. Mas malaki pa ang nawawalang kita dulot ng pagbaba o pagbura sa mga taripang ipinapataw sa mga inaangkat na kalakal alinsunod sa mga patakarang deregulasyon at liberalisasyon.

Ano pa man ang binitiwang pangako ni Aquino, kalauna'y hindi niya mababalewala ang sobrang laki na at patuloy pang lumalaking depisit, at kaakibat din nito ang napakalaki na rin at patuloy pang lumolobong utang ng guberno. Ilang araw pa lamang sa pwesto, itinulak na ng bagong upong komisyoner sa BIR ang pangungulekta ng Value Added Tax sa mga *toll fee* sa anim na mayor na *expressway* sa Luzon.

Tulad sa nakaraan, walang ibang masusulingan ang rehimeng US-Aquino: panibagong pangungutang, karagdagang mga buwis at pagtitipid sa mga gastusing panlipunan. Sa pagkabangkarote ng guberno, pabigat nang pabigat ang pasanin ng bayan. **AB**



Arroyo, kinasuhan ng korapsyon

Isang araw paglipas ng pagbabawal na ipagharap ng asunto si Gloria Arroyo, agad nagsampa ng kasong korapsyon laban sa kanya ang Bayan Muna (BM). Ang kaso ay isinampa nina Teodoro Casiño at Atty. Neri Colmenares ng BM sa Department of Justice (DOJ) nitong Hulyo 1.

Partikular na ikinaso kay Arroyo ang pagpasok ng gubyrno sa maanomalyang proyektong NBN-ZTE. Ang proyekto, na may planong pag-ugnayin ang lahat ng upisina ng gubyrno sa pamamagitan ng *internet* sa halagang \$329 milyon, ay naunsyami nang mabunyang ang mga anomalya rito. Sangkot din dito ang asawa ni Gloria na si Mike Arroyo at iba pang upisyal ng rehimeng Arroyo. Sadyang pinasobrahan nang \$130 milyon ang proyekto para makunan ito ng malalaking kikbak para sa mga Arroyo at malalapit nilang alipures.

Anila Casiño at Colmenares, sadya nilang isinampa ang kaso sa

DOJ dahil wala silang tiwala sa Office of the Ombudsman na pinamumunuan ni Mercedes Gutierrez, malapit na kaibigan ng mga Arroyo. Sa naunang desisyon ng Ombudsman, hindi nito isinama sina Gloria at Mike Arroyo sa talaan ng mga rekomendadong kasuhan sa Sandiganbayan. Ang kakasuhan lamang ay sina dating COMELEC Commissioner Benjamin Abalos at noo'y NEDA *director* Romulo Neri. Inabswelto rin ang apat na upisyal ng kumpanyang Tsinong ZTE na kakutsaba nina Arroyo sa anomalya.

Hindi na rin hinintay nina Casiño at Colmenares ang imbesti-

gasyong gagawin ng itinayong Truth Commission dahil mayaman na anila ang dokumentasyon ng Senado sa kasong NBN-ZTE sa mga pagdinig nito. Ang Truth Commission na pinamumunuan ni dating Chief Justice Hilario Davide Jr. ay itinayo ng rehimeng Aquino para imbestigahan muli ang mga kasong tumampok sa ilalim ng rehimeng Arroyo.

Hinahabol din nina Casiño at Colmenares na ituring na kasong administratibo ang reklamo laban kay Arroyo para pwede siyang suspindihin bilang kinatawan ng Kongreso habang dinidinig ang kaso.

Ang pagsasampa ng BM ng kasong korapsyon laban kay Arroyo ay una sa serye ng mga kaso laban sa kanya. Anang BM, kapag nakon-solidang nang lahat ng mga reklamo katulad ng anomalya sa *fertilizer fund*, iskandalong Hello Garci, *Philhealth cards* at kontrata sa Venable, sasampahan na nila ng kasong pandarambong si Arroyo. **AB**

Kurakot hanggang katapusan

Hanggang sa kahuli-hulihang segundo, kurakot pa rin ang nasa isip ng mga alipures ni Gloria Arroyo.

Ibinunyag nitong Hulyo 1 ng dating punong akawntant ng Department of National Defense (DND) ang pambabrasong ginawa sa kanya ni dating DND Secretary Norberto Gonzales para aprubahan ang pagpapalabas ng ₱5 milyong “pondong paniktik.” Hindi pumayag sa utos ni Gonzales si Leticia Obnimaga, kaya pinatalsik siya sa pwesto. Pinagmumulan ng korapsyon ang mga “pondong paniktik” dahil hindi na isinasailalim sa awditing ang mga ito.

Ibinunyag din ni Obnimaga na kwestyunable ang pagpapalabas ng pondo para sa byahe nina DND Undersecretary Arturo Lomibao at iba

pang upisyal ng departamento sa Singapore at iba pang bansa nitong huling bahagi ng Hunyo, dahil iilang araw na lamang ay lilisanin na nila ang kanilang mga pwesto.

Samantala, ibinunyag din noong Hunyo 14 ni Annabelle Abaya, dating pinuno ng Office of the Presidential Assistant on the Peace Process (OPAPP), ang talamak na korapsyon sa ahensyang ito. Sinabi niya na umabot sa ₱170 milyon ng ₱500 milyong pondo ng OPAPP na dapat ay para sa Social Integration Program (SIP o ayudang pangkabuhayan umano para sa mga sumusukong rebelde) ang nagamit para sa mga di kinakailangang bo-

nus at alawans para sa mga upisyal at tauhan ng ahensya.

Ang unang hati ng pondo ay naubos sa loob lamang ng isang taon. Ang ikalawang hati, na dumating nang pinamumunuan na ni Abaya ang OPAPP noong Nobyembr, ay ginamit sa kalakhan para sa di awtorisadong pagbibili ng sasakyan, pagtatayo at pagpapaganda ng mga upisina, pagbibyahe, mga suplay at iba pang gastos na inalam pa rin hanggang ngayon. Tatumpu't anim na porsyento (36%) lamang ng SIP ang napunta sa mga nararapat na benepisyaryo.

Sa kanyang pagbubunyag, kinumpirma lamang ni Abaya ang matagal nang kalakaran sa OPAPP ng paggamit sa SIP bilang isa sa pinakamalalaking palabigasan ng matataas na upisyal ng AFP at mga burukrata. **AB**



Mga aksyong militar

Siyam na elemento ng kaaway ang napatay at 11 ang nasugatan sa pitong magkakahiwalay na aksyong militar ng Bagong Hukbong Bayan (BHB) mula Hunyo 18 hanggang Hulyo 2.

Hulyo 2. Dalawang sundalo ang nasugatan nang makasagupa nila ang mga Pulang mandirigma ng BHB sa Sityo Lawaon, Barangay Baracatan, Toril District, Davao City.

Hunyo 30. Dalawang tropa ng 66th IB ang nasugatan nang salakayin ng mga Pulang mandirigma ng BHB ang kanilang detatsment sa Barangay Cambagang, Maragusan, Compostela Valley.

Hunyo 25. Nasugatan ang isang sarhento ng 47th IB na siyang namumuno sa isang *patrol base* sa Barangay Santo Rosario, Jamindan, Capiz nang maglunsad ng aksyong harasment ang BHB sa ilalim ng Jose Percival Estocada Jr. Command ng Central Front sa Panay. Ang *patrol base* na ito ay ilang kilometro lamang ang layo sa headquarters ng 3rd ID ng Philippine Army.

Bago ito, tinangkang lusubin ng militar noong Hulyo 18 ang pinaghihimpilan ng BHB sa Central Negros sa Sityo Igpapatao, Barangay Tacpao, Guihulngan City, Negros Oriental ngunit sila pa ang nagtamo ng kaswalti. Apat na elemento ng 11th IB at 2nd Scout Ranger Company ang napatay nang makasagupa nila ang mga Pulang mandirigma sa ilalim ng Leonardo Panaligan Command.

Pilit na pinabulaanan ni Col. Maximo Caro, kumander ng 303rd Infantry Brigade, ang kanilang natamong kaswalti sa pagsasabing ang BHB ang nagtamo ng apat na patay at siyam na sugatan. Gayunman, hindi maitatago ng militar na ang kanilang napatay na mga sun-

dalo ay dinala sa Riverside Medical Center sa Bacolod City at ang mga nasugatan ay ipinagamot sa Cebu City, ayon kay JB Regalado, tagapagsalita ng Leonardo Panaligan Command ng BHB.

Hunyo 24. Sinalakay ng mga Pulang mandirigma ng BHB ang upisina ng Eldore Mining Corp. sa Dumangmang, Labo, Camarines Norte. Dinisarmahan ng mga Pulang mandirigma ang nasorpresang mga pribadong gwardya ng minahan. Ang Eldore Mining Corp. ay isang malaking dayuhang kumpanya na nakabase sa Australia.

Hunyo 23. Dalawang sundalo ang napatay at isa pa ang nasugatan sa pananambang ng BHB sa mga tropa ng 3rd Special Forces Company-1st Special Forces Battalion sa Sityo Bigaan, Mamala, Sampaloc, Quezon. Pabalik sila sa kanilang punong himpilan habang sakay sa isang Lite Ace *van* nang maganap ang ambus.

Nasa magandang pusisyon ang mga Pulang mandirigma kaya epektibo nilang nasukol ang lumalabang mga pasistang kaaway. Dalawang M26 ang nasamsam ng BHB bago sila umatras. Ang armas na M26 MASS (Modular Accessory Shotgun System) ay kumbinasyon ng isang riple at 12-*gauge shotgun* at pwedeng ikabit sa istandard na ripleng M-4 o M16 kagaya ng M203 *grenade launcher*. Ginagamit ito ngayon ng mga sundalong impantri at *special operations forces* ng US Army.

Noong araw ding iyon, isang sundalo ng Philippine Air Force

(PAF) ang napatay at dalawang iba pa ang nasugatan nang tambangan sila ng BHB sa Barangay Calantas, Calaca, Batangas. Nakasakay ang mga sundalo ng PAF sa isang motorsiklo.

Hunyo 18. Tatlong tropa ng 1105th Police Mobile Group-Philippine National Police (1105th PMG-PNP) ang napatay at limang iba pa ang nasugatan nang salakayin ng mga Pulang mandirigma ng Antonio Nerio Antao Command (ANAC)-Front 15 ang detatsment ng mga pulis sa Sityo Dao, Barangay Poblacion, Cateel, Davao Oriental.

Para tabunan ang kanilang ka-hihiyan, bulaang ibinalita ng mga propagandista ng PNP-Police Regional Office XI na kanilang nabigo ang pagsalakay ng BHB at nakapatay sila ng limang Pulang mandirigma bukod pa sa tatlong sugatan.

Ang aksyong militar na ito ay isa ring aksyong pamarusa, ayon kay Dyomabuk Kadyawan, tagapagsalita ng ANAC. Malalaki ang krimen ng naturang mga pulis. Sangkot sila sa pagpatay noong isang taon kay Ludenio "Dos" Monson, masugid na kritiko ng mga abuso ng 1105th PMG-PNP sa Boston. Sangkot din sila sa pagpapalaganap ng iligal na droga at pangongotong sa mga komersyal na trak na dumadaan sa detatsment. Maraming beses nang igini-giit ang mga residente na palayasin na ang detatsment.

Matapos ang pangyayari, ibinaling ng mga pulis ang kanilang galit sa mga walang labang sibilyan. Apat ang pinagbubugbog at arbitraryong pinaghahalughog ang mga bahay ng mga pinaghihinalang sumusuporta sa mga gerilyang bayan, dagdag ni Dyomabok Kadyawan. AB

BM *coordinator*, pinaslang

Isang *provincial coordinator* ng Bayan Muna ang kauna-unahang biktima ng ekstrahudisyal na pamamaslang sa ilalim ng rehimen ni Benigno Aquino III. Pinaslang din ang isang mamamahayag sa Kalinga at isang saksi sa karumal-dumal na masaker sa Maguindanao, samantalang pinagtangkaan ang buhay ng isang pari sa Aurora.

Hulyo 5. Pinaslang ng mga di pa nakikilalang salarin si Fernando Baldomero, 61, *provincial coordinator* ng Bayan Muna sa Aklan. Si Baldomero ay nahalal sa pangalawang pagkakataon bilang konsehal sa bayan ng Lezo noong nakaraang eleksyon. Nasa kanyang bahay noon si Baldomero sa Barangay Estancia, Kalibo, Aklan at naghahandang ihatid ang kanyang 12-taong gulang na anak na lalaki sa eskwelahan nang siya ay pagbabarilin. Bago ito, pinagtangkaan na rin ang buhay ni Baldomero nang hagisan ng granada ang kanyang bahay noong Marso 19.

Hulyo 3. Binaril at napatay si Jose Daguio, 75, sa kanyang tahanan sa Tuga, Tabuk, Kalinga nitong Hulyo 3. Si Daguio ay reporter ng "Radyo Natin Tabuk" at kolumnista ng isang lokal na pahayagan sa Kalinga. Katatapos lamang maghapu-

nan ni Daguio nang barilin siya ng hindi pa nakikilalang salarin.

Hunyo 26. Pinagbabaril ng mga elementong anti-Komunista ang silid-tulugan ni Fr. Joefran Talaban sa Casiguran, Aurora alas-2 ng madaling araw. Nakaligtas siya sa pamamaril. Nag-iwan ng naka-laminate na polyeto ang mga salarin na pirma ng grupong tinatawag na Aniban ng Ayaw sa Komunista. Pinalalayas nila si Fr. Talaban na anila'y may "kaugnayan sa mga Komunista." Tumakas ang mga salarin sa pamamagitan ng itim na kotseng walang plaka.

Si Father Talaban ay siyam na taon nang pari ng Nuestra Señora de la Salvacion.

Samantala, nanawagan ang



World Council of Churches (WCC) kay Benigno Aquino III na agarang bigyan ng katarungan ang dalawang pinaslang na taong-simbahan nitong Hunyo. Nanawagan ito bilang pakikipagkaisa sa National Council of Churches in the Philippines at Iglesia Filipina Independiente (IFI) sa pagtuligsa sa ekstrahudisyal na pamamaslang kina Benjamin Bayles sa Negros Occidental at Jovelito Agustin sa Laoag City, Ilocos Norte. Si Bayles ay pinaslang noong Hunyo 14. Kinabukasan, si Agustin naman ang pinaslang. Parehong mga ministro ng IFI ang dalawa. Si Agustin ay brodkaster din sa radyo sa Ilocos Norte.

Hunyo 14. Pinatay ang isang susing saksi sa masaker sa Maguindanao. Si Suwaib Upham, kilala sa palayaw na Jesse, ay pinaniniwalaang ipinapatay ng angkang Ampatuan. Umamin si Upham na isa siya sa pitong bumaril sa umabot sa 57 biktima, kabilang ang 32 mamamahayag noong Nobyembre 23, 2009. Itinuro niyang utak sa masaker ang pamilyang Ampatuan.

Unang lumitaw na saksi si Upham noong Marso 19. Dinala siya sa Maynila upang mag-aplay sa Witness Protection Program ng Department of Justice. Bumalik si Upham sa Mindanao matapos magpatumpik-umpik ang Department of Justice. Tumangging makipagkita si Upham sa mga upisyal ng DOJ sa mismong bakuran nito dahil sa impormasyon niyang nakikipagtulungan sa mga Ampatuan ang ilang matataas na upisyal ng departamento.

Tinuligsa ng maraming grupo at organisasyon ang pagpaslang kay Upham. Kabilang sa mga ito ang Human Rights Watch na nakabase sa US.

Tularan ang magiting na buhay ni Kasamang Azad

TULARAN ang kagitingan ni Kasamang Azad (Cherukuri Rajkumar), anang Partido Komunista ng Pilipinas (PKP) sa isang pahayag nitong Hulyo 5. Nakiramay ito sa mamamayang Indian kaugnay sa pagkakapaslang ng pulis sa isa sa nangungunang rebolusyonaryong lider ng bansa. Dinukot at sinalbeyds si Ka Azad ng mga kasapi ng Andra Pradesh Special Police Branch noong Hulyo 2 sa kagubatan ng Adilabad malapit sa hangganan ng Maharashtra at Andra Pradesh. Kasama niyang noon si Ka Hem Pandey (Jitender).

Si Ka Azad ay kasapi ng Komite Sentral ng Partido Komunista ng India (Maoista) at nagsisilbing tagapagsalita nito bago siya patak-sil na paslangin ng mga pasistang pulis. Mahigit tatlong dekada niyang inilaan ang kanyang buhay sa rebolusyonaryong adhikain ng mamamayang Indian.

AB

AB

42 aktibista, inaresto sa Mendiola

Umbot sa 42 magsasaka at mga aktibista ang inaresto ng mga pulis matapos buwagin ang kanilang kilos-protesta sa Tulay ng Mendiola sa Maynila noong Hulyo 3.

Karamihan sa mga hinuli ay mga magsasaka mula sa Hacienda Luisita Inc. sa Tarlac at Hacienda Yulo sa Laguna. Kabilang din sa mga hinuli ang *campaign officer* ng Unyon ng Magsasaka sa Agrikultura (UMA) na si Servillano Luna Jr.

Ang mga aktibista ay nagkakampo na sa Mendiola mula pa noong Hunyo 30, isang araw bago maupo si Benigno "Noy" Aquino III bilang bagong presidente.

Ayon sa mga magsasaka, pangunahing hinihiling nila ang pagsasakutaparan ng tunay na reforma sa lupa. Iginigiit nila ang pamamahagi ng 6,000 ektarya ng Hacienda Luisita at 7,000 ektaryang lupa ng Hacienda Yulo. Subalit sa halip na tulungan sila ay binuwag pa ang kanilang piketlayn ng mga elemento ng Manila Police District (MPD) Station 8.



to ng Manila Police District (MPD) Station 8.

Kaagad binatikos ng Anakpawis Party ang marahas na pagbuwag sa piket ng mga magsasaka. Ayon kay Anakpawis Rep. Rafael "Ka Paeng" Mariano, ang 42 ang unang kaswalti ng rehimeng Aquino at ang pagkakaaresto nila ay senyales

na magpapatuloy ang paglabag ng estado sa karapatang-tao.

Napilitang palayain ng mga pulis kinabukasan ang mga inaresto at iniatras ang isasampang mga kaso.

Samantala, patuloy na nakaranas ng pananakot ang mga magsasaka sa Hacienda Luisita at Hacienda Yulo sa kamay ng mga sundalo.

Ayon sa Alyansa ng Manggagawang Bukid sa Asyenda Luisita (AMBALA), sinusundan ng mga sundalong may dalang baril ang mga lider-magsasaka ng asyenda saan man sila magpunta. Tinatakot din ang mga residente ng asyenda na huwag nang makipaglaban para sa kanilang lupain. Nagpadala rin ng mga elemento ng Citizens Armed Force Geographical Unit (CAFGU) sa isang barangay sa asyenda at patuloy na nagrerekrut ng mga Barangay Intelligence Network (BIN). Binuwag din ang piketlayn ng mga magsasaka ng Hacienda Yulo noong Mayo 21 kung saan 100 ang nasaktan at sampu ang ikinulong. AB

Pangwawasak sa unyon sa ABS-CBN, binatikos

Binatikos ng unyon ng mga manggagawa sa ABS-CBN ang pangwawasak ng maneydsment sa Internal Job Market (IJM) Workers Union at ilegal na pagsibak sa 25 unyonista.

Ilegal na tinanggal ng maneydsment ng ABS-CBN—isa sa pinakamalalaking istasyon ng radyo at telebisyon sa bansa—ang 25 manggagawa nito matapos sila tumanggap pumirma ng kasulatang nagsasaad na sila ay kontraktwal lamang at nagbabawal sa kanilang magsampa ng anumang kaso laban sa kumpanya.

Nakasaad din sa kontrata na tanggap sila ng mas mababang sa-

hod (halos sangkatlo lamang kumpara sa dati), di tatanggap ng kabayaran para sa obertaym at mga espesyal na araw o bakasyon. Di rin kikilalanin ang dati na nilang serbisyo sa kumpanya kaya wala silang karapatang humingi ng *backpay* para sa panahong pinanatili silang kontraktwal kahit pwede na silang gawing regular. Aalisin din ang kanilang katiyakan sa trabaho dahil hindi na sila siguradong

ieempleyo kapag nawala ang programa sa telebisyon kung saan sila nagtatrabaho.


Ayon kay Antonio Perez, presidente ng unyon, *video editor* ng istasyon at kabilang sa mga sinibak, dapat na silang ituring ng kumpanya na mga regular na empleyado dahil karamihan sa kanila ay ilang taon nang nagtatrabaho sa istasyon. Mali, aniya, ang pangangatwiran ng kumpanya na sila ay hindi mga tunay na empleyado ng kumpanya kundi kabilang lamang sila sa ABS-CBN Internal Job Market (IJM) o talaan ng mga manggagawang may mga kakayahan o talento na maaaring pagpilian ng mga kokontratahin ng kumpanya ayon sa pangangailangan nito. Taliwas sa sinasabi ng ABS-CBN, nakasaad

sa mga *payslip*, *identification card*, *income tax return* at iba pang dokumento na sila ay empleyado ng kumpanya at hindi ng IJM.

Umaabot sa 1,400 sa 2,700 empleyado ng ABS-CBN ang nasa ilalim ng IJM na sa aktwal ay pag-aari at pinatatakbo rin ng ABS-CBN. Halos 100 lamang sa 1,400 na ito ang ginawang regular na empleyado nang magpapirma ng kontrata ang ABS-CBN nitong Hunyo para umano gawing regular ang mga nasa IJM. Kinwestyon na ng mga manggagawa ang programang IJM sa Department of Labor and Employment (DOLE). Anila, ginagamit lamang ng ABS-CBN ang IJM bilang balon ng mga manggagawang kaswal. Subalit kinatigan ng DOLE ang ABS-CBN at sinabing naayon ito umano sa Labor Code.

Binatikos ng mga manggagawa ang hindi pagkilala sa kanilang unyon. Hindi inaprubahan ng DOLE ang aplikasyon ng unyon para sa Certification Election (CE) noong Nobyembre 2009 dahil hindi umano mga regular na empleyado ang mga nasa IJM. Malinaw, ayon kay Perez, na nagsabwatan ang ABS-CBN at DOLE para wasakin ang unyon. Itinatag ang unyon noong Marso 2009.

Patuloy pa rin ang ginagawang harassment sa mga kasapi ng unyon. Binabagu-



bago, kinakansela o ipinagpapaliban ang kanilang mga iskedyul sa trabaho. Nakaamba rin ang pagtatanggal sa dagdag na 100 karaniwang empleyado at iba pang manggagawa.

Kinuha na rin ng kumpanya ang serbisyo ng HRH Agency Personnel upang palitan na ang IJM at hindi na kilalanin ang unyon. Plano ring kumuha ng iba pang empleyado ang kumpanya mula sa mga sangay nito sa ibang rehiyon para ipalit sa mga tinanggal na empleyado.

Isa ang ABS-CBN sa mga nangungunang 1,000 korporasyon sa bansa. Nasa ilalim ito ng Lopez Group of Companies at mayroong kabuuang kita na P1.9 bilyon para sa unang kwarto pa lamang ng taon. Kabilang ang mga Lopez sa nagbigay ng pinakamalalaking kontribusyon sa kampanya ni Benigno Aquino III noong eleksyon. **AB**

Pagkamatay ni Cardeño, muling iimbestigahan

Muling tumampok ang usapin ng panghihimasok-militar ng US sa Pilipinas nang aprubahan ng Korte Suprema nitong Hunyo 24 ang petisyon para sa *writ of amparo* at *writ of habeas data* ng pamilya ng isang sibilyang misteryosong namatay sa loob ng pasilidad-militar ng US sa Marawi City. Alinsunod dito, binibigyang-proteksyon ng korte ang pamilya ng biktima at may karapatan din silang mabigyan ng lahat ng mga upisyal na dokumento at impormasyong makatutulong sa paglutas sa kaso.

Si Gregan Cardeño, 33 anyos, ay iniulat na nagbigti sa kanyang silid sa himpilan ng Joint Special Operation Task Force-Philippines (JSOTFP) sa Marawi City noong Pebrero 2, dalawang araw lamang matapos siya makarating sa kampo. Nag-aplay siya bilang *security guard* sa *employment agency* na Skylink at ang upisyal niyang destinasyon ay ang Camp Siongco sa

Awang, Datu Odin Sinsuat, Maguindanao. Subalit sa halip na dalhin siya roon, dinala siya sa hedkwarters ng JSOTFP sa loob ng 103rd Infantry Brigade ng Philippine Army. Ginawa siyang tagasalin nang malaman ng mga sundalong US na bihasa siya sa Bisaya, Tagalog, Ingles, Tausug at Bahasa Indonesia.

Bago siya mamatay, nakatawag

at nakapag-text pa si Cardeño sa kanyang pamilya. Aniya, iba ang ipinagagawang trabaho sa kanya at gusto na niyang umatras. Siya rin lamang daw ang Pilipino sa loob ng pasilidad ng US, maliban sa kusinero.

Pinalalabas na nagpakamatay si Cardeño subalit hindi ito pinaniniwalaan ng kanyang pamilya, laluna't marami siyang sugat at iba pang pinsalang tinamo sa katawan na hindi isinama sa upisyal na awtopsiya ng pulis. Ni walang upisyal na *death certificate* o permiso na inilabas ang anumang otoridad nang dalhin na ng mga sundalong US ang kanyang bangkay sa Zamboanga City.

Noong Marso 3-4, naglunsad ang iba't ibang grupo ng imbestigasyon sa pagkamatay ni Cardeño. Hindi sila pinahintulutang inspek-

syunin ang kwarto kung saan ntagpuan umano ang bangkay ng biktima, at hindi rin ipinakita ang kubre kamang sinasabing ginamit niya sa pagbibigti.

Lalong lumaki ang pagdududa at pangamba ng pamilya nang patayin ng mga di kilalang lalaki si Maj. Javier Ignacio noong Marso 25 sa Zamboanga City. Nakatakda siyang humarap sa mga kagawad ng midya para ibunyag ang mahalagang impormasyon hinggil sa kaso.


Si Ignacio, hepe ng Military Police ng Western Mindanao Command ay kaibigan ng pamilya Cardeño at siyang nagrekomenda sa biktima na magtrabaho para sa mga tropang US dahil sa malaking sweldong iniaalok dito.

Tumutulong noon si Ignacio sa imbestigasyon ng pagkamatay ni Cardeño nang siya naman ang paslangin. Bago ito, sinabi niyang maraming nag-aalok sa kanya ng suhol para tumahimik na lamang at kalauna'y pinagbantaan na siyang papatayin kung hindi siya titigil sa kanyang imbestigasyon.

Maraming nauungkat na usapin sa mysteryosong pagkamatay nina Cardeño at Javier. Una ay ang kainutulan ng Visiting Forces Agreement (VFA) na proteksyunan ang mga Pilipinong biktima ng krimen sa kamay ng mga tropang US. Sa halip, ginagamit pa ang VFA para pagtakpan ang gayong mga krimen at palusutin ang mga salaring sundalong US.

Nauungkat din sa kasong ito ang lalim at lawak ng panghihimasok-militar ng US sa Pilipinas. Ang Skylink, lokal na *employment agency* na nagpasok kay Cardeño sa trabaho ay kinontrata lamang ng DynCorp. International, isang kumpanyang US na nakatutok sa paghahanap ng mga kontraktwal na empleyado para gumampan ng maseselang trabaho para sa Pentagon at US State Department.

Nang mamatay si Cardeño, lumabas na sa aktwal ay nakaasayn siya sa Liaison Coordination Elements (LCE), isang yunit-militar ng US na kinabibilangan ng mga elemento mula sa sangay ng *special operations* ng iba't ibang serbisyo.



Gawain nito ang pagpayo at pagtulong sa piling mga yunit ng AFP sa pagpapalano at integrasyon ng lahat ng datos paniktik para suportahan ang mga operasyon laban sa itinuturing nilang mga grupong "terorista" o "insurhento." Saklaw ng operasyon ng LCE ang armadong rebolusyonaryong kilusan sa Pilipinas, ang Moro Islamic Liberation Front at ang Abu Sayyaf.

Di sinasadyang mabunyag ang presensya ng yunit na ito sa loob ng isang kampo militar ng AFP nang mamatay si Cardeño. Di rin malayo na pinatay sina Cardeño at Ignacio dahil sa mga napag-alaman nilang mga lihim at maruruming gawaing pinagkukutsabahan ng mga tropa ng US at ng AFP.

Muling pinatatampok ng karumal-dumal na pagpaslang kina Cardeño at Ignacio ang kahalagahan ng pagsusulong ng masiglang kilusang masa para labanan ang panghihimasok-militar ng imperyalismong US sa Pilipinas at kamtin ang katarungan para sa mga biktima ng imperyalistang karahasan. AB

Kumander ng US sa Afghanistan, sinibak

TINANGGAL ni Pres. Barack Obama ng US si Gen. Stanley McChrystal sa tungkulin bilang kumander ng mga pwersang militar ng US at NATO sa Afghanistan nitong Hunyo 23.

Ang pagsibak kay General McChrystal ay ibinunsod ng mga naging pahayag niya at ng kanyang mga kasamahan sa panayam ng magasing *Rolling Stone* na hindi paborable kay Obama.

Ayon sa *Rolling Stone*, hindi nasiyahan si McChrystal sa kaunahan niyang pakikipag-usap kay Obama noong isang taon. Ilan pang mga komento ng malalapit na tauhan ng heneral ang inilathala ng magasin at hindi nagustuhan ng administrasyon.

Sa kanilang mga pahayag, inilarawan ng pangkat ni General McChrystal ang umano'y pagbabangayan ng militar at ng mga tagapayo ni Obama sa panahong umaani ng maraming batikos ang estratehiya ng Pentagon sa gera sa Afghanistan.

Ipinalit sa kanya si Gen. David Petraeus, ang kasalukuyang kumander ng mga pwersang US sa Iraq. AB



Lumalalang krisis sa European Union

Biglang bumulusok na naman ang bentahan ng mga sapi sa pandaigdigang pamilihan nitong Hulyo 2. Pang-apat na ulit na itong nagaganap mula nang pumutok ang krisis sa Greece dalawang buwan na ang nakararaan.

Hirap na hirap ang mga mamuhunan na alpasan ang krisis na humahagupit sa buong European Union (EU) na nagsimula sa Greece noong Mayo. Dahil sa kalagayang kinakatawan ng ekonomya ng EU ang 30% ng kabuuang ekonomya ng mundo, pinangangambahan na maaaring pagsimulan ito ng panibagong paglala ng krisis ng pandaigdigang sistemang kapitalista na nagsimula noon pang 2007.

Naunang nabahala ang pamilihan ng mga sapi sa pandaigdigang saklaw at bumulusok ang bentahan ng mga sapi nang ibunyag sa publiko ng bagong halal na presidente ng Greece noong Nobyembre 2009 ang matagal nang papalalang problema sa sobra-sobra nang paglaki ng deposit sa badyet at panlabas na utang ng guberno. Sumambulat ang krisis pang-ekonomya sa bansa nitong Mayo nang mapilitan na ang desperadong guberno ng Greece na magpasaklolo sa EU at International Monetary Fund.

Mula nang mabuo ang 16 na myembro ng Eurozone (mga bansang komun na gumagamit ng *euro* bilang salapi) ay nagtakda na sila ng regulasyon na dapat hindi lumampas sa 60% ng kani-kanyang Gross Domestic Product (GDP o kabuuang produksyon sa loob ng bansa) ang kanilang utang at hindi lalampas sa 3% ng GDP ang kanilang

deposit sa badyet. Layunin nitong makontrol ang sobrang paggastos at pangungutang para matiwasay umanong magtuluy-tuloy ang paglago ng ekonomya ng bawat bansa.

Bukod sa Finland at Luxemburg, walang ibang bansa ang nakatatatima sa mga regulasyong ito. Ang bansang nagtala ng pinakamalaking tantos sa pangungutang ay ang Greece kung saan umabot ito sa 124.9% ng GDP. Ang deposit naman nito ay 13.6% na ng GDP. Pumapangalawa lamang ito sa Ireland na siyang may pinakamalaking deposit sa badyet.

Halos lahat ng 27 bansang saklaw ng European Union ay may mabigat na problema sa nagtataasang deposit sa badyet at malalaking panlabas na utang. Katulad ng Greece, ang ilan pang bansa sa saklaw ng EU ay wala nang kakayahang magbayad ng panlabas na utang at wala na rin sa katayuang muling makapangutang. Kasunod ng Greece, ang Italy ang may pinakamataas ang tantos sa utang na 118.2% ng GDP. Ang iba pa ay Portugal, 85.6%; Germany, 78.8%; at Ireland, 77.3%. Ang deposit sa badyet ng guberno ng Ireland ay umabot na sa 14.7%; United Kingdom, 10.4%; Spain, 10.1%; Latvia, 9.9%; at Portugal, 8%.

Isang dahilan kung bakit labis na pinangangambahan ang pagbagsak ng ekonomya ng Greece ay ang panganib na magdeklara ito ng pagkabangkarote at sadya itong hindi magbayad ng mga utang nito. Tiyak na magbubunga

ito ng malaking pagkalugi sa mga bangko sa Germany, United Kingdom, France, Japan at US dahil 80% ng utang panlabas ng Greece ay nagmula sa mga bansang ito.

Para maapula ang krisis sa Greece at maiwasang lumaganap ito sa iba pang bansa ng EU at sa buong mundo, nagkaisa ang EU at International Monetary Fund (IMF) noong Mayo na isalba ito sa pamamagitan ng pagpapautang dito ng 45 bilyong *euro* (\$54.2 bilyon) sa simula hanggang 110 bilyong *euro* (\$1.322 trilyon) kung kakailanganin pa. Nakakundisyon ito sa pagpapatupad ng Greece ng mga hakbangin sa pagtitipid, kabilang ang pagbawas o pagpako ng sweldo ng mga empleyado ng guberno, pagkakaltas sa mga pensyon at pagbawas sa mga benepisyo para sa mga bata.

Ang gayong mga kundisyon ay nagbunsod ng matinding galit sa mamamayan ng Greece at naging mitsa ng pambansang welga na nilahukan ng 50,000 manggagawa noong Mayo 4-5.

Dahil sa pag-iral ng halos parehong sitwasyon sa nakararami pang bansa sa EU, nagdesisyon ang EU at IMF noong Mayo 10 na maglaan ng 750 bilyong *euro* o halos \$1 trilyong pondo bilang ayuda sa mga bansa ng EU na nangangailangan ng kagyat na tulong. Kapalit nito, inoobliga ang bawat guberno na magpataw ng mga hakbangin sa pagtitipid, katulad ng sa Greece, para umano maiwasang matulad dito. Itinutulak din ng EU at IMF ang pagdaragdag ng mga buwis.

Ikinagagalit ng mga manggagawa at pamilya nila ang matitinding hagupit ng mga patakaran sa mahigpit na pagtitipid ng mga guberno sa saklaw ng EU dahil sa pagkakait nito sa kanila ng karapatan sa saligang benepisyo at serbisyong panlipunan.

AB



EU, binabayo ng malalakas na kilos-protesta

Lumalaganap ang mga aksyong protesta ng mga manggagawa sa mga bansang sakop ng European Union (EU) dahil sa matindi nilang pagtutol sa mahigpit na mga hakbanging pagtitipid na balak ipatupad sa mga bansang ito.


Nakikini-kinita ng mga manggagawa na ang naturang mga hakbangan ay magdudulot ng labis na kahirapan. Mangangahulugan ang mga ito ng malalaking kaltas sa badyet para sa mga batayang benepisyo at serbisyong panlipunan tulad ng pensyon, edukasyon, pangkalusugan, suporta sa mga bata, pabahay at iba pa. Anila, "kami ang direktang pumapasan sa bigat ng higanteng pautang na hindi naman namin matatamasa at kami ang pinarurusahan sa bigat ng krisis na hindi naman kami ang may kasalanan."

Hunyo 29. Nagmartsa ang 12,000 raliyista sa syudad ng Athens sa Greece at nagrali sa harap ng gusali ng parlamento kung saan pinagdedebatehan ng mga mambabatas ang pagkakaltas sa pensyon na idinikta ng EU at IMF bilang bahagi ng programa sa mahigpit na pagtitipid ng guberno. Tinututulan nila ang plano ng guberno na kaltasan ang kanilang pensyon at pataasin ang edad ng pagreretiro. Nagdulot ang martsa-rali ng dislokasyon sa industriya ng turismo at pampublikong transportasyon.

Ikalimang mayor na welga na itong inilunsad ng mga unyon ng manggagawa sa pampubliko at pribadong sektor ng Greece mula noong Mayo 1. Nagbanta ang mga unyon na maglunsad ng 24 oras na welga ngayong Hulyo kaugnay ng planong pagbabawas ng pensyon. Bago ito, 50,000 manggagawa ang

naglunsad ng dalawang araw na pangkalahatang welga noong Mayo 4 at 5. Sinundan ito ng martsa-rali noong Mayo 20 sa syudad ng Athens at ng mga kilos-protesta noong Hunyo 5 at 23 na pinamunuan ng mga komunistang grupo.

Hunyo 29. Naglunsad din ng welga ang mga manggagawa ng Spain na nagparalisa sa buong sistema ng transportasyon sa mga syudad. Ikinagalit ng mga nagwelga ang hakbangan ng guberno na kaltasan ng 5% ang sweldo ng mga manggagawa sa pampublikong sektor. Noong Mayo 27 ay nanalo nang isang boto sa parlamento ang mga hakbangan sa pagtitipid. Bago ito ay naglunsad na ang mga manggagawa ng isang araw na welga noong Hunyo 8 na nilahukan ng 75% ng 2.3 milyong myembro ng dalawang pinakamalaking unyon sa pampubli-



kong sektor ng Spain.

Hunyo 25. Naglunsad ng martsa-rali ang mga manggagawa sa mga syudad ng Rome, Milan at iba pa sa Italy para igiit sa guberno na bawiin ang 25 bilyong *euro* (\$30.1 bilyon) na kaltas sa badyet. Nilahukan ito ng mga myembro ng CIGL, pinakamalaking unyon sa Italy na may anim na milyong myembro. Nagbanta ang mga raliyista na muling maglulunsad ng kilos-protesta sa Setyembre 29 kung hindi tutugunan ng guberno ang kanilang mga kahalilingan.

Hunyo 24. Sa France, dalawang milyong manggagawa ang naglunsad ng 200 kilos-protesta sa iba't ibang lugar sa bansa noong Hunyo 24. Tinututulan nila ang hakbangan ng guberno na itaas ang edad ng pagreretiro mula 60 tungong 62 anyos. Pinamunuan ang nasabing kilos-protesta ng CGT, ang pinakamalaking unyon sa France.

Hunyo 12. Sa Germany, libu-libong manggagawa ang nagprotesta laban sa hakbangan ng guberno na kaltasan ang badyet ng 80 bilyong *euro* (\$96.30 bilyon). Ito na ang pinakamalaking kaltas ng guberno sa badyet mula noong Ikalawang Digmaang Pandaigdig. Tinututulan din nila ang mga dagdag na buwis na ipapataw sa loob ng apat na taon mula 2010.

Mayo 27. Sa Portugal, libu-libong manggagawa ang nagmartsa sa syudad ng Lisbon para labanan ang mga hakbanging pagtitipid ng guberno, kung saan tampok ang pagkaltas ng 5% sa kita ng mga empleyado sa pampublikong sektor. Ang naturang rali ang pinakauunang kilos-protesta sa bansa mula nang pagtibayin noong Mayo 13 ang mga hakbangan sa pagtitipid sa mga saligang benepisyo at serbisyong panlipunan. **AB**



50,000 manggagawa, nagwelga sa Bangladesh

Mahigit 50,000 manggagawa sa mga pagawaan ng damit sa Dhaka, kabisera ng Bangladesh ang sunud-sunod na nagwelga mula Hunyo 19 hanggang 22 para igiit ang pagtataas sa kanilang sahod. Marahas na sinupil ng mga pulis ang naturang mga welga.

Hiniling ng mga manggagawa na ipatupad ang pagtataas ng buwanang minimum na sahod mula 1,662 *taka* (halos \$24.00 o ₱1,145.00) tungong 5,000 *taka* (\$71.00 o ₱3,270.00) ayon sa napagkasunduan ng kanilang mga unyon, gubyrerno at may-ari ng mga pagawaan noon pang 2006.

Noong Hunyo 19, nagsilabasan sila sa mga pabrika, naglunsad ng piket at nagbarikada sa mga daan patungo sa sona ng pagmamamuktura sa Ashulia at Kanchpur, 30 kilometro ang layo sa hilagang bahagi ng Dhaka. Sa dalawang sonang ito matatagpuan ang mga pagawaang nagsusuplay ng damit pa-

ra sa malalaking dayuhang kumpanya tulad ng Wal-Mart, Tesco, Zara, Carefour at H&M.

Tinangka ng mga pulis na buwagin ang kanilang barikada. Binomba ng tubig ang mga welgista, pinaputukan ng *rubber bullets* at hinagisan ng tigas. Gumanti ang mga welgista sa pamamagitan ng paghagis ng mga bato sa mga pulis. Sa laking galit nila, winasak nila ang may 200 pabrika. Mahigit 100 welgista ang nasugatan.

Pagsapit ng Hunyo 22, tumindi ang galit ng mga welgista nang magdesisyon ang Bangladesh Garment Manufacturers and Exporters' Association (BGMEA) na isara nang

walang taning ang 250 pagawaan. Muli silang nagpiket sa mga daan, nagsunog ng mga gulong at mga sasakyang nagpupumilit na dumaan.

Ang industriya ng tela at damit ang pinakamalaking (80%) eksporter ng Bangladesh at kumikita ng \$15 bilyon bawat taon.

Kaugnay nito, inilunsad din noong Hunyo 27 ang kauna-unahang pangkalahatang welga sa Dhaka, sa pamumuno ng oposisyong Bangladesh National Party (BNP). Tinuligsa ng mga nagprotesta ang mga kabiguan at kalabisan ng administrasyon ni Prime Minister Sheikh Hasina Wazed mula nang manungkulan ito noong 2009. Iginiit nila ang paglulunsad ng maagang eleksyon bago mag-2013. Tanda ng suporta ng mamamayan para sa welga, paralisado nang isang araw ang buong bansa. Walang bumyaheng pampublikong sasakyan at sarado ang lahat ng mga negosyo. **AB**

Protesta sa pulong ng G8 at G20

Sinalubong ng isang linggong protesta ang tatlong-araw na pulong ng Group of 8 (G8) at Group of 20 (G20) noong Hunyo 25 hanggang 27 sa Ontario, Canada. Ang G8 at G20 ay grupo ng pinakamayayamang bansa sa buong daigdig. Paksa ng mga pulong ang pag-ahon umano sa pandaigdigang krisis sa pinansya at ang bumabayo ngayon sa European Union na krisis sa naglalakihang depisit at utang ng gubyrerno.

Tinuligsa ng mga nagprotesta ang kawalang-saysay ng naturang pulong na ginastusan ng mahigit isang bilyong dolyar mula sa buwis ng mamamayan ng Canada. Binatikos nila ang mga patakaran nito tulad ng mga hakbangin sa pagtitiip ng mga benepisyong para sa mga manggagawa at mamamayan at serbisyong panlipunan.

Mahigit 10,000 aktibista mula sa iba't ibang grupong lumalaban sa globalisasyon ang nagmartsa noong Hunyo 26 sa Toronto, pinakamalaking syudad ng Canada. Ang

naturang martsa ay karugtong at nagsilbing rurok ng iba't ibang porma ng maliliit na kilos-protesta. Isang araw na naparalisa ang sistema ng transportasyon at nagsara ang mga ospital at iba pa sa Toronto.

Ang martsa ay nagmula sa rali na inilunsad sa harap ng gusali ng Parlamento ng Ontario. Dalawang kilometro pa lamang ang layo ng martsa sa Metro Toronto Convention Centre, kung saan idinadaos ang pulong, hinarang na ito at sinugod ng mga *riot police*. Isang

grupo ang lumaban sa mga pulis gamit ang mga bato, bote at iba pang matitigas na bagay. Gumanti naman ang mga pulis sa pamamagitan ng tigas, *smoke grenade* at *rubber bullets*. Sinundan ito ng paghahalughog sa mga gamit at pambubugbog. Mahigit 400 raliyista ang inaresto.

Kinabukasan, nireyd ng mga pulis ang isang unibersidad na tinigtigan ng mga aktibista. Umabot sa 200 ang inaresto at dinetine sa kulungang inihanda ng pulisya, apat na kilometro ang layo sa pinagdarausan ng pulong. Hindi nagtagal at naglunsad ng rali ang mga aktibista sa harap ng naturang kulungan para palabasin ang iba pang mga detenido. Marahas na binuwag ng mga di-unipormadong pulis ang rali at dinetine ang mga pinaghihinalaang lider. **AB**

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 13
Hulyo 7, 2010
www.philippinerevolution.net

Editorial

Noynoy Aquino: Ang bagong mukha ng kontra-rebolusyon

Si Benigno “Noynoy” Aquino III ang bagong mukha ng kontra-rebolusyon. Pormal na siyang iniluklok noong Hunyo 30 bilang bagong pinuno ng papet na reaksyunaryong gubyerno. Siya na ngayon ang pangunahing tagapagtaguyod ng paghahari ng imperyalismong US, at lokal na malalaking burgesyang komprador, burukratang kapitalista at panginoong maylupa.

Sa kanya ngayon nakaa-tang ang pangunahing responsibilidad na ipagpatuloy ang pamamahala sa bulok at bangkaroteng malakolonyal at malapyudal na sistema, pata-tagin at patakbuhan ang estado nito, at supilin ang anumang hamon sa papet na reaksyunaryong kapangyarihan.

Katulad ng inaasahan sa kanya ng imperyalismong US at mga lokal na naghaharing uri, itinuon ni Aquino ang kanyang unang mga araw sa pagkokonsolida ng papet na hukbo. Batid ni Aquino na ang Armed Forces of the Philippines (AFP) ang pangunahing sandalan ng reaksyunaryong paghahari sa Pilipinas. Ito ang mag-sisilbing pangunahing instru-

mento niya sa paghawak sa kapangyarihan at pagpapatupad ng mga tungkulin. Kaya naman todo ang pagsuporta niya rito: pangakong dagdag na tauhan, bagong kagamitan, pabahay para sa mga sundalo at iba pa.

Hindi niya kinastigo ang AFP sa malalaking krimen nito sa mamamayan. Sa gayong paraan, ipinahiwatig ni Aquino ang pagsuporta niya sa buhong na pasistang kampanya ng panunupil ng AFP na nagresulta sa laksang kaso ng paglabag sa karapatang-tao. Tahasan niyang binalewala ang hinaing ng ilampung libong biktima ng karahasan militar at ng mga tagapagtaguyod ng karapatang-tao. Ni

hindi siya nangakong magkakaroon ng makatarungang pagtu-tuos sa laksa-laksang pasistang krimen sa ilalim ng mga nagdaang rehimen at pagpamura sa mga utak nitong upisyal ng papet na militar at pwersang panseguridad.

Habang todo-todo ang paglalangis niya sa AFP, wala ni katiting na pansing ibinigay si Aquino sa mga saligang suliranin ng bayan at sa kanilang sigaw para sa kata-rungang panlipunan. Ang mga unang araw niya sa poder ay itinuon sa pagpapasiklab



Mga tampok sa isyung ito...

Seryoso ba si Aquino sa usapang pangkapa-papaan? PAHINA 5

Bayan Muna coordinator, pinaslang PAHINA 7

Krisis sa European Union, lumalala PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Dinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com